



मेयर साहया खँ छता ज्या छता खुसि सिथय यँ मनपाया भौतिक संरचना

• लहना संवाददाता

लहना वा:पौ/स्टन्ट यायेगुलिं माहिर यँ महानगरपालिकाया मेयर बालेन साहया थम्हं या:गु निर्णय अ:ख: ज्या यायेगु यानाच्चंगु दु। सर्वोच्च अदालतं खुसिया मापदण्ड थप ४० मिटर कायम यायगु निर्णय लिपा हथासं खुसि ज:ख: छुं नं कथंया भौतिक संरचना दय्के मजिउ धका: फर्मान जारी याम्ह मेयर साहं थ:गु हे निर्णय अ:ख: यँ १४ वडा बल्खुइ खुसि सिथय फुटसल दय्केगु ज्या न्ह्याकूगु दु।

बल्खुया तरकारी बजा: स्वयां १०० मिटर च्वय् खुसि सिथय फुटसलया निरति संरचना दय्केगु ज्या न्ह्याकेवं स्थानीय जनता चिन्तित जूगु दु। स्थानीय वासिन्दाया कथं खुसिया सिथय थुकथं दय्कूगु संरचनाया कारणं याना: वंगु साउन ११ व १२ गते थेंज्या:गु खुसिबा: वल धा:सा थप जोखिम अप्वइगु धासैं चिन्ता प्वंकुगु ख:। वय्कलं धयादिल, 'यदि न्हापा थेंज्या:गु गुसिबा: वल धा:सा थव संरचनाया कारणं याना: खुसिबा: पनाबी गुकिया लिच्च: कथं ल: खुसिइ मखु छैय् छैय् थ्यनी।



खुसि सिथय गुगुं नं कथंया भौतिक संरचना दय्के मजिउ धासैं वय्कलं न्हापाया खुसिबालं हे आपालं छँ दुबानय् ला:गु ख:सा आ: फुटसल दय्केधुंका: अभ्र समस्या वय्कइगु

खँ धासैं धयादि, 'खुसिबा:या लिसे प्लाष्टिकजन्य फोहोर नं चुइका: हइ। अज्या:गु फोहोर दक्वं थ्वहे संरचनाय् थाइ। थुकिं याना: ल: बांलाक बा: वनेगुलिं पंग: ब्वलनी।'



थ्वहे इवलय् खुसि सिथय संरचना दय्कूगु सम्बन्धय् १४ वडाया वडा अध्यक्ष सुमन श्रेष्ठयाके न्यने कने यायगु इवलय् फुटसल वडां मखुसैं यँ महानगरपालिकां दय्कूगु जानकारी बियादिसैं वय्कलं खुसि सिथय कासा निरति मा:गु संरचना दय्के फइगु जिकिर यानादीगु दु। तर यँ महानगरपालिकां हे खुसिया ४० मिटर ज:ख: संरचना दय्के मजिउ धा:सा सुचं जारी या:गु बारे धा:सा वय्कलं धयादिल, 'खुसि सिथय उद्यान दय्के जिउ, उकथं हे आवश्यक जुल धा:सा फुटबल,

भलिबल आदि ग्राउन्ड दय्के जिउ। अथे हे फुटसल दय्का समस्या वइ मखु।'

न्हापा थें खुसिबा: वल धा:सा छु यायगु ले धका: न्यनागु न्हयस:या लिस: बिसैं धयादिल, 'खुसिबा: वइगु धइगु दैय् छक: निक: ख:। अथेजुया: फुटसल दय्का: छुं समस्या वइ थें जित: मता। अथे ख:सां नं थव संरचना वडा दय्कूगु मखु, छिं यँ महानगरपालिकाया भौतिक निर्माण विभागय् छक: स्वापू तया: न्यने कने यानादिसां जिउ।'

ल्यं ७ पेजय्

प्रलिशा शाक्य मिस नेवा: ११४५



लहना वा:पौ/यलया प्रलिशा शाक्य मिस नेवा: ११४५ या उपाधि त्याकूगु दु। नेप्लीज फेसन होमया खसालय् यँ जूगु फिनाले १९ मह प्रतिस्पर्धीयात ल्यूने लाका: वय्कलं उपाधि त्याकूगु ख:।

वह:या ताज नापं वय्कलं छू लख तका दां लिसें थिथी सिर पा त्याकादीगु दु। आइतवा: प्रज्ञा प्रतिष्ठानया हलय् नेवा: मयजुपिसं नेवा: भाषा, कला, संस्कृति व भेषभूषा न्हयब्व:गु ख:। प्रलिशा मिस नेवा:या ताज नापनापं मिस बेस्ट नेपालभाषाया

सिरपा नं त्याकूगु ख:। उगु ज्याइवलय् फस्ट रनरअप चन्द्रागिरी नगरपालिकाया लुनिभा: मानन्धर फस्ट रनर अप व यँया लुमना महर्जन सेकेण्ड रनर अप घोषित जूगु ख:।

मिस ट्यालेन्ट व सोसल वेलफेयर सेकेण्ड रनर अप श्रद्धा महर्जनं त्याकेत ता:लात सा मिस ट्यालेन्ट विधाय् अनुश्री शाक्य फस्ट रनर अप जूगु ख:। मिस ट्यालेन्ट विधाय् श्रीया मानन्धर सेकेण्ड रनरअप जूगु ख:।

ल्यं ७ पेजय्





नेवा: राष्ट्रिय म्ये

चमि : दुर्गालाल श्रेष्ठ लय् चिनामि : तिर्थ माली

धुन देने धुन सँन्त्यलं भी फुककं हे छम्ह जुइ धुन
भीगु लागाय् भी स्वयं हे ज: जुया धुन लुइ धुन
ह्यांगु भुमिइ अष्टमण्डल ह्यांगु चा: दुने थी नगु
भीगु नेवा: ध्वाँय् थ्व हे ख: ज्यान भी सकस्यां छगू
जातितय् स्वायत्त राज्यं लुइ कपं च्वय् भिलिमिलिं
राष्ट्र भ:भ: धाय्क न्ह्याके भीगु च:तिं भीगु हिं

सम्पादकीय



छगू निकाय नं स्यंकेगु व मेगु निकाय नं भिंकेगु प्रवृत्ति गुबलय् तक

यँ नापं मेमेगु त:धंगु शहरय् छगू मिले मजगु घटना पिहां
वयाच्चंगु दु। छगू निकाय लँ दयकेगु याइ अल् मेगु निकाय न
स्यंकेगु याइगु योजना नकतिनि हे यँया सिंहदवारय्य जूगु छगू
घटनायात कायेज्यु। नेपाल विद्युत प्राधिकरण ठेक्का पाखें
भूमिगत लाइन विस्तार यानाच्चंगु इलय् मेलम्ची खानेपानी
आयोजनाया २० इन्च त:जा:गु डिआइ पाइप तज्या:त। गुकिं
याना: च्या:घौं तक लगातार ल: सतकय् बा: वन। उगु घटनां
३० लाख लिटर ल: बर्बाद जूगुलिं जिल्ला अदालत, सतक, जंगल,
अभ्र बस्ती लिसे सरकारी भवन डुबानय् ला:गु ख:। बबरमहल,
मिन भवन, अनामनगर, व ज:ख:या क्षेत्रय् ल: आपूर्ति सेवा बन्द
जूगु ख:। लँ भासे जूगु ख:सा वया ज:ख: ध्याच: जया: लँ बन्द
जुगु ख:। थुगु प्रक्रियाय् त्वनेगु ल:, मत व लँ लिसे स्वापू दुगु स्वंगू
संस्था स्वानाच्चंगु दु। विद्युत प्राधिकरण बबरमहलय् जूगु क्षति
मर्मतया ज्या न्ह्याकेधुंकूगु दु। छुं ई लिपा अनया अवस्था सामान्य
जुइ। न्ह्याथेसां, थुगु घटनां सम्बन्धी संस्था समन्वय अनिवार्य
यायेमा:गु दु।

लिपांगु सन्दर्भ धइगु विद्युत प्राधिकरणया ज्यां याना:
खानेपानी आयोजनाया संरचनाय् जूगु क्षति ख:। थ्व सिबें न्ह्य:
मेलम्ची आयोजना अन्तर्गत पाइप लाय्गु इवल्य सतक क्षति जूगु
ख:। चीधंगु विकासया ज्या नियमित रुपं न्ह्यानाच्चंगु शहरी
क्षेत्रय् छम्हेसिगु ज्यां मेम्हेसित नोक्सान जुयाच्चंगु दु। थ्व थुलि
नियमित घटना जुयाच्चंगु दु कि सम्बन्धित निकाय व लाभग्राही
वर्ग तक अभ्यस्त जुयाच्चंगु खनेदु। थज्या:गु ज्यां सुयातं जवाफदेही
दय्काच्चंगु मदु। मन्त्रीतय्सं थ:थ:गु भाषणय् उपयोगिता खँ
ल्हाय्गु स्वयां नं सम्बन्धी कानून हय्गु खँ धाय्गु यानाच्चंगु दु।
थ्व विषय नं नीति व ज्याइवल्य दुथ्या:गु दु। तर कानून दय्के
फयाच्चंगु मदुनि। शहरी क्षेत्रय् थीथी निकाय दथुइ य: य: थे ज्या
याय्गु यानाच्चंगु दु। थुकिं याना: शहरय् फुकक थासय् विद्युत
व दूरसञ्चारया तार कुतुं व:गु, ध: स्यंगु, फुटपाथया टाइल
स्यंगु, लँ स्यंगु, ल:या पाइप लिक जुयाच्चंगु थेंज्या:गु दृश्यत
खनेदइ। छगू निकायं मेगु निकायया ज्या प्रति छुं संवेदनशीलता
मदयेक थ:गु ज्या न्ह्याकीबलय् थथे अप्राकृतिक क्षति नं जुइ।
व्यवस्थित अध्ययनया आधारय् सही तथ्यांक मदुसां अन्तर
निकाय समन्वय व सहकार्य जुल धा:सा राज्यं त:धंगु रकम बचत
जुइ। गुकियात मेथाय् नं छ्यलेफइ। विकास, निर्माण, व मर्मत
सम्भारया ज्या नं दिगो व प्रभावकारी जुइ। मेखे मेगु निकायं
पंग: थना: छगू निकायया ज्या दिनाच्चंगु गुनासो नं वयाच्चंगु दु।
थुकिं याना: तत्काल मा:गु सेवा काय्त्त लिबानाच्चंगु दु। आ:या
थीथी कानूनय् समन्वय व सहकार्यया अवधारणा नं दुथ्याकात:गु
दु। न्ह्याथेसां, थ्व बाध्यकारी खनेमदु। उकिं कमसेकम शहरी
क्षेत्रय् नियमित निर्माण व मर्मत सम्भारया ज्याया समन्वय याय्त्त
गुटिलिटी करिडोर कानूनया आवश्यकता दु। कानून बाध्य
जुइबलय् समन्वय व ग्वाहालि बाध्यकारी व प्रभावकारी जुइफु।
सम्बन्धित संस्था दथुइ सहलह याना: न्ह्या:वन धा:सा ज्या नं
याकनं क्वचाइ। मन्तयसं दु:ख फय् मालिमखु।

अन्तर्राष्ट्रिय मातृभाषा दिवस व नेपालय् मातृभाषा पत्रकारिता



नृपेन्द्रलाल श्रेष्ठ

बंगलादेशया ढाकाय् छथ्व
ल्याय्म्हतय्सं थ:गु मां भाय्या
सम्मान यायेमा:गु माग यासैं न्ह्यागु
आन्दोलनया सलं पिहांव:गु दिवस
ख: अन्तर्राष्ट्रिय मांभाय् दिवस। थ्व
व हे दिं ख:, गुकुन्हु थ:गु मांभाय्यात
राज्यय् स्थापित याकेत बंगलादेशया
ल्याय्म्हतय्सं ज्यान तकं बिल।
हलिमय्य थ्व हे छगूया छगू जक हे
घटना ख: भाषाया नीति देश हे कुचा
द:गु। हलिमय् मेमेगु घटना स्वय्गु
ख:सा राजनीतिया कारण जक देश
कुचा जूगु खनेदु।

बंगलादेशय् १९५२ फेब्रुअरी
२१ या दिंयात कया: सकसिया थुगु
दिंयात मां भाय् यात मतिना याइपिस
लुमकेगु याइ। नेपालय् न उगु दिंयात
कया साहित्य ज्याभूव: नाप थीथी
गोष्ठि याना वयाच्चंगु दु। अथेहे
नेवा: पत्रकार राष्ट्रिय दबू न वंगु न्यादै
न्ह्य:निसे थुगु दिंयात कया मातृभाषा
पत्रकारिता बिषय ज्याभूव: याना
वयाच्चंगु दु।

नेवा: पत्रकार राष्ट्रिय दबू
न मातृभाषायात म्वाकेगु निति
पत्रकारिताया नं भुमिका दइ धका:
वंगु भीदै निसें थीथी ज्याभूव: याना
वयाच्चंगु दु। नेपालय् धर्मादित्य
धर्माचार्य थौं स्वयां सच्चि दैं न्ह्य:
नेपाल संवत् १०४४ स्वांया पुन्हि
कुन्हु बुद्ध धर्म लय्पौ पत्रिका पिकया
मातृभाषा पत्रकारिताया सुरुवात
यानादीगु इतिहास दु। वहे दिंयात
लुमका मातृभाषा शताब्दी दिं कथं न
पत्रकार दबू न थीथी ज्याभूव: न्ह्याका
वयाच्चंगु दु। मातृभाषाय् पत्रकारिताया
भूमिका दइ धका: पत्रकार दबू नं
निक्व: तक राष्ट्रिय सम्मलेन व हलिमय्
दकलय् न्हापांगु मातृभाषा पत्रकारिता
सम्मलेन तकं याय्धुंकूगु दु।

नेपालय् पत्रकारिताया इतिहास
स्वय्गु ख:सा जंगबहादुर राणा बेलायत
भ्रमण वने धुका: अन लिहांव:गु
इलय् ज्वनाव:गु गिद्ध प्रेस लिपा जक
खनेदु। व हे मेसिनं छापे या:गु पत्रिका
गोरखापत्र पिहांव:गु थोकन्ह्य: १२७
दै दय्धुंकूगु दु। थ्व हे नेपालय् न्हापां
पिहांव:गु पत्रिका धका: धाय्गु या:।
वया लिपा जक हे पत्रिका पिहां वय्गु
सुरु जूगु खनेदु। नेपालभाषां पिहांव:गु
पत्रिका थौं स्वय्गु ख:सा सच्चि दैं दय्
धुंकल। धर्मादित्य धर्माचार्य सच्चि दैं
न्ह्य: कलकताय् वना बुद्ध धर्म लय्पौ
पिकया नेपालभाषा पत्रिकाया सुरुवात
याय्गु ज्या जूगु ख:।

वयां लिपा नेपालभाषां थीथी
पत्रिका मदिकक पिहां वयाच्चंगु दुसा
गुलि पिहां वया: नं दिनाच्चंगु दु।
जनजाति ख्यलय् स्वय्गु ख:सा मेपिं

जनजाति स्वयां नेवा:त पत्रकारिता
ख्यलय् न्ह्य:ने हे खनेदु। गोरखापत्र
न्हिपौ जुया: पिहां मवनिइगु इलय् हे
फतेबहादुर सिंह विस २०१३ साल
भाद्र महिनाय् नेपालभाषा नामं न्हिपौ
प्रकाशन याय्धुंकूगु दु। थौं न्हिपौ
नेपालय् पिहांव:गु स्वंगूगु न्हिपौ
ख:। दकलय् न्हापां २००८ सालय्
सिद्धिचरण श्रेष्ठ “आवाज” राष्ट्रिय
दैनिक पिका:गु ख:सा वयां लिपा
“समाज” राष्ट्रिय दैनिक पिहांव:गु
ख:। २०१७ सालनिसे जक गोरखापत्र
न्हिपौ कथं पिहांव:गु ख:।



व्यवस्था ह्यूसानं नं संचार रूखलय् उलि ह्यूपा व:गु
अनुभूति याय् फयात्तवंगु खनेमदु। संघीय सरकार,
प्रदेश सरकार व स्थानीय सरकारं आ:तक छु
कथंया स्थानीय नापं मातृभाषा पत्रकारितायात
कया: छुं नं नीति दय्कूगु खनेमदु।

नेपालभाषाया पत्रकारिता
स्वय्गु ख:सा थौंतक नं मदिकक उलि
हे न्ह्यानाच्चंगु दु। थौंतक स्वय्गु
ख:सा नेपालभाषां पत्रिका, अनलाइन,
टेलिभिजन व रेडियो प्यंगुलि हे मदिकक
प्रकाशन व प्रसारण जुयाच्चंगु दु। आ:
नं नेपालभाषां छगू न्हिपौ, खुगू वा:पौ,
न्यागू अनलाइन, निगू वा:छि पौ, निगू
प्रचलित लिपिया लय्पौ, निगू रञ्जना
लिपिया लय्पौ, न्यागू टेलिभिजनय्,
छगू २४ हे घण्टाय् नेपालभाषां प्रसारण
जुयाच्चंगु दुसा खुगुलि मल्याक लय्
पौ आ: न मदिकक पिहां वयाच्चंगु
दु। अथे हे सरकारी निकायपाखे
स्वय्गु ख:सा रेडियो नेपालय् बुखैं नाप
नेपालभाषाया ज्याभूव: न्ह्यानाच्चंगु
दु, नेपाल टेलिभिजनय् बुखैं व
ज्याइव: न्ह्यानाच्चंगु दु, गोरखापत्रय्
व रासस नं बुलेटिन नेपालभाषायात
दुथ्याकात:गु दु।

भी देशय् न स्वय्गु ख:सा
भाषायात दमन न्हापांनिसे यानाच्चंगु
हे दु। थौं नं भाषायात कया: राज्यं
विभेद याय्गु मत्व:तुनि। न्हापां राणा
कालया इलय् नेपालय् मां भासं च्वईपिं
व न्वावाइपिंत जेलय् कुंगु इतिहास
मदुगु मखु। नेपालय् नं थ:गु मातृभाषा
ब्बनेगु च्वय्गु शासकतय्गु न्ह्य:ने
उलि अपू मजू। वि.सं. १९९७ सालय्
राणा शासन विरुद्ध न्वाइपिंत यख्खा:गु
ख:सा नेपालभाषां च्व:पिंत राज्यं
चरम यातना ब्यूगु ख:। उगु इलय्
नेपालभाषां च्व:पिंत खानतलासी व
धरपकड धुंका: नेपालभाषा पत्रिकाया
सम्पादक, प्रकाशक फतेबहादुर
सिंहयात जन्मकैद, सिद्धिचरण श्रेष्ठ व
धर्मरत्न यमियात १८ दैं, चित्तधरयात ६

दै व धर्मादित्य धर्माचार्ययात स्वलाया
जेल सजाय ब्यूगु इतिहास भीगु
हे देशय् दु। वयां लिपा पंचायत
ब्यवस्था नं जुजु महेन्द्र छगू भाषा छगू
भेषया नीति हया: दमन मया:गु मखु।
२०२१ साल वैशाखय् रेडियो नेपालय्
नेपालभाषाया ज्याभूव: न्ह्याना
वयाच्चंगु जीवन दबू लिकागु ख:।
उगु चिइकूलि छगू त:धंगु हे आन्दोलन
तकं जूगु ख:। थथे नेपालय् नं मां भासं
न्वावाय्गु च्वय्गुलि गुलिसिया ज्यान
गुमे याय्मा:गु दुसा गुलि जेल जीवन
बिते यायेमा:गु दु।

भाषा बचे याय्गु व च्वय्गु नितिं
प्रजातन्त्र, गणतन्त्र व लोकतन्त्र न्ह्यागु
हे ब्यवस्था व:सा शासकतय्सं थीथी
कथं पंग: थनेगु आ: तक न त्व:तुगु
मदुनि। न्हापा पंचायत ब्यवस्थाय् जुजु
महेन्द्र छगू भाषा छगू जातिया नीति हया:
भाषा व जातियात दमन या:गु ख:सा
आ: देशय् लोकतन्त्र वय्धुंकूगु दु।
व्यवस्था ह्यूसानं नं संचार ख्यलय् उलि
ह्यूपा व:गु अनुभूति याय् फयाच्चंगु
खनेमदु। संघीय सरकार, प्रदेश सरकार
व स्थानीय सरकारं आ:तक छु कथंया
स्थानीय नापं मातृभाषा पत्रकारितायात
कया: छुं नं नीति दय्कूगु खनेमदु।
पत्रकार दबुलिं हनाव:गु मातृभाषा
पत्रकारिता दिवस धयागु मातृभाषी
पत्रकारतय् थज्या:गु हे अवस्था व
पीडायात कया: राज्यया ध्यानाकर्षण
याकेगु नितिं ख:, समस्याया
समाधान याकेगु नितिं, अवस्था
भिंकेगु नितिं राज्ययात आवश्यक
पला: ल्हवकेबीगु नितिं ख:। उकिया
नापं विगतय् नेवा: पत्रकारतय्सं
नेपा:या पत्रकारिता ख्यलय्, मातृभाषा
पत्रकारिताया विकासया ख्यलय्
बियावंगु योगदान न्हू पुस्तायात सीके
बीगु नितिं ख:।

फेब्रुअरी २१ नेपालय् थीथी कथं
ज्याभूव: याना छगू दशकनिसें अन्तर
र्षिय मातृभाषा दिवस हना वयाच्चंगु
दु। पत्रकार दबू नं थुगु दैं नेपालय्
मातृभाषा पत्रकारिता सुरु जुगु सच्चि दैं
दुगु लसताय् मातृभाषा शताब्दी दैं कथं
हनाच्चंगु दु। अथेहे संयुक्त राष्ट्र संघ
नं मातृभाषा दशक कथं हनेगु निर्णय
जूगुलि थुगु पलाखं हलिमय मातृभाषा
विकास जुइगु भलसा काय्छिं।







स्वयम्भू महोत्सवं सकारात्मक भावना विकास याइ

थ्वहे फागुन १० गतेनिसं १७ गतेतक यँ महानगरपालिका १५ वडाया ग्वसालय जुइत्यंगु स्वयम्भू महोत्सव २०८१ यात कया: वडा अध्यक्षलिसं महोत्सवया कजि ईश्वरमान डंगोल लिसे जूगु खँल्हाबल्हाया सार संक्षेप थन न्ह्यब्वयाच्वना - सं. ।

❖ छिगु वडाय जुइत्यंगु स्वयम्भू महोत्सवयात कया: छुं खँ धयादी ?

यँ महानगरपालिका १५ वडाय ला:गु विश्व सम्पदाय सूचीकृत स्वयम्भू महाचैत्य थ्वहे वडाय ला। नेपा: दुहां वइपिं पर्यटकत थन मवइ धइगु जुइ मखु। थ्व थाय् ऐतिहासिक सम्पदा जायाच्वंगु दु। बुद्धया शान्तिभूमि जुयाच्वंगु थाय् ख:। उक्तं हे थन सम्यक महादान भिनिदैय् छक्व: जुइगु या:। लिसे थन ऐतिहासिक सांस्कृतिक सम्पदा नं आपालं दु। नेपाल सम्वतया प्रवर्द्धक संखधरं फि का:गु लखतिर्थ नं थन हे दु। तान्त्रिक रुपय् व्यस: (विजेश्वरी, शोभा भगवती, गीता देग: नं मू सम्पदा कथं संरक्षण जुयाच्वंगु दु। थ्व वडाय छु गज्या:गु सम्पदा स्थल दु धइगु नं महोत्सव पाखे सकातिं म्हसिकेगु कुत: याय्गु जुइ। फागुन १० गते निसं १७ गते तक छवा: धइथें स्वयम्भू महोत्सव न्यायेकत्यनागु दु। थुलि ता:हाक:क न्ह्याइगु महोत्सवया नितिं निवा:यात गावक सामान वय्थुंक्नु दु। छवा: तक न्ह्याइगु महोत्सवय् ऐतिहासिक सम्पदात खनेदइ कथं फोटो पदर्शन याय्गु, सांस्कृतिक ज्याइव: यायेगु, अथे हे नसा त्वसा, रहनसहनया लिसे बुसां निसं सिबल्य तकया ब्वज्या जुइ। उक्तं. हे नि:शुल्क स्वास्थ्य शिवर याय्गु जुइ। महोत्सव जुइगु ला द हे दु भी सकलें छथाय् च्वनेगु फइगु अवस्था जुल धा:सा सकारात्मक सुभावया लिसे ज्या याय्त् प्रेरणा चूलाइ धका: महोत्सव याय्त्त्यनागु ख:।

❖ महोत्सवया नारा हे 'पुर्खाया पौरख, भीगु गौरव' धका: बियात:गु दु। थुकिया लिउने छु कारण दु ?

पुर्खाया थ्व सम्पत्ति, सम्पदा भीगु गौरव ख:। पुर्खाया थ्व सम्पत्तियात ल्यंकेत व उकिया प्रचार प्रसार यायेत जिमिसं 'पुर्खाया पौरख जिमिगु गौरव, स्वयम्भू महोत्सव २०८१' धका: प्रचार यानाच्चनागु ख:। पुर्खाया सम्पत्ति पुर्खा



ईश्वरमान डंगोल

ल्यंकात:गु थीथी सम्पदा दुगुलिं लिसें स्वयम्भूया जानकारी, थनया रहनसहन आर्थिक, सामाजिक, संस्कृतियात तिब: बीगु नितिं थ्व महोत्सवया ग्वसा: ग्वया:गु ख:।

❖ स्थानीययात आर्थिक तिब: जुइगु खँ धयादिल। थ्व गुक्तं जुइ। गुक्तं व्याख्या यानादी ?

स्थानीयया आर्थिक तिब: धइगु थ्व वडाय च्वापिं मिसातयसं थ:गु ल्हा:या सिप उगु सिपयात पित हयेगु ख:। गुगु सिप महोत्सवय् वइपिसं न्याना काइ। उक्तं हे थुगु वडां आर्थिक उत्पादन जुइ कथंया थीथी तालिम बीगु ज्या जुइधुंक्नु दु। मिसापिसं थ:गु हे छैय् च्वना: दयेकात:गु सामान महोत्सवय् ब्वयेगु वा मीगु ज्या जुइ। गुकिं छुं भचा जक जूसां मिसापिसं

उत्पादन या:गु सामान मिया: आर्थिक लाभ कायेफइ। थ्व महोत्सव लिपा मिसापिसं उत्पादन या:गु सामानया बजारीकरण जुइगु विश्वास जिमिसं कयागु दु।

❖ महोत्सवय् व्यापारीक स्टलत नं दइगु खँ छिं धयादिल। गुलि स्टल तय्गु छिकपिनिगु योजना दु ?

आ: तक स्टल माल धका: वडाय सछिगू स्वयां अप्व: निवेदन व:गु दु। मेता खँ छु धा:सा थन आपालं रेष्टुरेन्टत उकियात बन्द यायेगु खँ जुइ मखु। मेता खँ जिमिसं नसात्वसां स्वयां नं हस्तकला, वडां तालिम बिउगु बारिष्ठा कफी दय्केगु, बेकरी तालिम, लाकां दय्केगु तालिम, कौशी खेती, स्वां सय्केगु आदि तालिम बियागु दु। थ्व फुक्कं तालिम का:पिसं उत्पादन

आ: तक स्टल माल धका: वडाय सछिगू स्वयां अप्व: निवेदन व:गु दु। मेता खँ छु धा:सा थन आपालं रेष्टुरेन्टत उकियात बन्द यायेगु खँ जुइ मखु। मेता खँ जिमिसं नसात्वसां स्वयां नं हस्तकला, वडां तालिम बिउगु बारिष्ठा कफी दय्केगु, बेकरी तालिम, लाकां दय्केगु तालिम, कौशी खेती, स्वां सय्केगु आदि तालिम बियागु दु।

या:गु महोत्सवया इवलय् ब्वय्गु जुइ। महोत्सवय् म्होति नं न्यय्गू घरेल उत्पादनयात प्रोत्साहन याय्गु जुइ।

❖ महोत्सवय् गुगु समुदायं ब्वति काइगु अनुमान यानादियागु दु ?

थुगु वडाय गुलि नं समुदाय दु फुकसित क:घाय्गु कुत: याय्गु जुइ। पर्यटन लिसे नं स्वा:गु जुया: महोत्सवय् पर्यटकतयत गुक्तं ब्वति काय्केगु धइगु खँय् अप्व: ध्यान बियागु दु। आपा: स्वयां आपा: पर्यटन दुकया: थनया वासिन्दाया आयआर्जनय् तिब: बीगु आज्जु कयागु दु।

❖ छिकपिसं वंगु इलय् नं स्वयम्भू महोत्सवया ग्वसा: ग्वयादी ख:। वंगु इलय् छु गज्या:गु अनुभव यानादिया ?

वंगु इलय् नं समुदाययात क:घाना: थीथी ज्याइव: यानागु दु। न्हापांखुसी यानाबलय् उलि व्यापक मजुल। अथेजुया: आ: थ्व महोत्सवयात व्यापक दय्केगु कुत: जुयाच्चंगु दु। स्वयम्भू महोत्सव न्हापांखुसी याय्त्त्यनागु ख:। वंगु इलय् जिमिसं युवातयत छन्हु, विद्यालययात छन्हु, नेपाली प्रहरी व सेनायात याना: छन्हुया ज्याइव: याना वयाच्चनागु ख:। उगु ज्याइव: तकसं प्रभावकारी जुल। गुकिया कारण 'स्वयम्भू महोत्सव' याय्मा: धइगु जिमिसं ताय् का। वंगु इलय् जिमिसं वालय् छन्हु धका: न्हय्गू वा: तक ज्याइव: यानागु ख:। ज्याइवलय् आपालं स्थानीय

कलाकार, बाजं खलकं ब्वति का:गु ख:। उगु इलय् जिमिके आपा: बजेट मदु। आ: जिमिसं स्वयम्भू महोत्सव न्याय्केत्यनागु दु। फुकसिया ग्वाहालि, फुकसिया ब्वति तिबलं थुगु महोत्सव उत्कृष्ट जुइ धइगु आशा जिमिसं कयागु दु।

❖ थुगु स्वयम्भू महोत्सवया मू आर्कषक छु जुइ ?

महोत्सवया मू मुख्य आर्कषण धइगु हे भी सकलें छथाय् मुनेगु ख:। थन मिसा, युवा, मस्त बुद्ध फुक्कं छथाय् मुना: सकारात्मक सन्देश बीगु ख:। मेता खँ धइगु पवित्र भूमिइ ज्याइव: याय्त्त्यनागु दु। बहुजन हिताय, बहुजन सुखाएया खँयात ध्यानय् तया: स्वयम्भूया भूमिइ त्यागया भावना विकास याय्गु ख:। मू खँ धइगु सम्यक महादान याइगु थासय् भीसं ज्याइव: याय्त्त्यनागु दु। भिनिदैय् छक्व सम्यक महादान जुइगु पवित्र भूमिइ पला: जक त:सां नं सकारात्मक भावना उत्पन्न जुइ। सकारात्मक सोचया वकासया नितिं नं महोत्सवं तिब: बी।

❖ थ:गु व्यष्ट इलय् नं जिमित ई बियादीगुलिं छित: आपालपं सुभाय् लिसे स्वयम्भू महोत्सव त:जिक क्वाय् मा धका: भिन्तुना बियाच्चना।

स्वयम्भू महोत्सवया लिसे वडाया विकास व समसामायिक खँया जानकारी बीत छिगु मिडियां थाय् बिउगुलिं आपालं सुभाय् देछानाच्चना।

नेवा: पत्रकार राष्ट्रिय दबू यँ जिल्लाया दैमूज्या सम्बन्धि हथायगु सुचं

नेवा: पत्रकार राष्ट्रिय दबू यँ जिल्लाया दैमूज्या थ्व हे वइगु ने.सं. ११४५ चिल्लाथ्व दुतिया, १ मार्च २०२५ (२०८१ फागुन १७ गते) शनिवा:या दिनय् यायेगु जूगुलिं यँ जिल्लाया दुज:पिसं थ:पिनिगु दुज: न्हूधा: (सदस्यता नविकरण) व न्हू दुज: जुइ मंदुपिसं वइगु ने.सं. ११४५ सिल्लागा चर्तुदश, २७ फ्रबुअरी २०२५ (२०८१ फागुन १५ गते) विहीवा: तकया दुने यानादीत इनाप यानाच्चना।

स्वापूया निति

आर्विन्द्रमान सिं, नाय: :- ९८४१२०४९५५

मनोजरत्न शाही, छ्याउजे :- ९८०८२६००१७

Sweet Cave

(जीवन दाईया पस:)

Kalimati, Kathmandu, Nepal

Tel: 4275511, 9741112777, 9851063000

यहाँ भोज तथा पार्टीहरूको लागि चाहिने स्पेशल दही, पनिर, लाखामरी, लालमोहन, बर्फी, रसबरी तथा अरु विभिन्न परिकारका मिठाईका लागि सम्पर्क राख्नुहोस्।

आउटडोर भेज क्याटरिङ पनि गरिन्छ।

भिक्षुसंघयात सामूहिक संघदान



लहना वाःपौ/ स्वयम्भूया ज्या जूगु दु।
ऐतिहासिक आनन्दकुटी विहारय् उदाय् समाजया संयोजकत्वय्
भिक्षुसंघयात सामूहिक संघदान याय्गु न्ह्याःगु उगु संघदान ज्याइवल्य्

थ्यमथ्यं ३५० म्ह भिक्षु, भिक्षुणीलिसें अनगारिकापिनिगु उपस्थिति दुगु खः। वसपोलपितं सामूहिक दान प्रदान नापं भोजन दान याय्गु ज्या जूगु खः। उदाय् समाजपाखें खःसा खःगु थ्व प्यक्वःगु संघदान ज्याइवः खः। थुगुसिइ समाजनाप आबद्ध मजुपिं व्यक्ति व संस्थातय्त नं दान प्रदानय् दुथ्याकाःगु धकाः खःसाः खलकं धाःगु दु। संघदान न्ह्यवः आनन्दकुटी विहारया प्रमुख भिक्षु धर्ममूर्ति महास्थविरं बुद्धधर्मय् दानया महिमा बारे कनाबिज्यासें श्रद्धापूर्वक याःगु दानं आशा मयाःसां दातायात आपालं आपाः पुण्य चुलाइ धकाः धयाबिज्यागु खः।

मेयर साह्या ...



थ्वहे इवल्य् भौतिक निर्माण विभागया प्रमुख सुरज शाक्ययात फोनय् स्वापू तय्गु कुतः यानागु खःसां नं वय्कलं फोन धाःसा ल्हवनामदी। मेखे मेयर साहं थःगु हे प्रतिवद्धता विरुद्ध यानाच्चंगु मेगु निर्माण ज्या खः। यँया दरबार मार्गय् दय्काच्चंगु फुटपाथ। दरबार मार्गय् थौकन्हय् ग्रेनाइड तयाः फुटपाथ दय्काच्चंगु दुसा उकियात कयाः सामाजिक सञ्जालय् विरोध नं जुयाच्चंगु दु।

थःत स्ट्रक्चर इन्जिनियर धाइम्ह मेयर साहं यँया थीथी छः देगः दय्कूगुयात कयाः प्रशंसा याय्गु यानाच्चंगु दुसा तर यँ महानगरपालिकां दय्काच्चंगु फुटपाथयात कयाः जुयाच्चंगु विरोधय् धाःसा छुं नं कथंया प्रतिक्रिया बियाच्चंगु मदु। थ्वहे इवल्य् दरबार मार्गय् ग्रेनाइड तयाः फुटपाथ दय्केगु ज्या याय्वं मेयर साहं छगू यु ट्युबय् बिउगु अन्तर्वार्ता धाःसा भाइरल जुयाच्चंगु दु।

उगु अन्तर्वार्ताय् मेयर साहं स्विनिगः अथे नं ख्वाउँगु थाय् जूगु व थन कक्रिट वा ग्रेनाइड छ्यले मजिउ धासैं धाःगु दु, 'थन बबाल कथंया टाइल तयाबी, थन मार्बल लाय् धयाः ला मजिल नि। मार्बल छाय् तइ मखु धाःसा स्विनिगः ख्वाउँसे च्वंगु थाय् खः। मार्बल लात धाःसा छिगु तुति पुचाइ, छि न्यासि वने फइ मखु। अप्पा ला उलि ख्वाउँइ मखु नि। लाकां मन्ह्यासे न्यासि हे वंसां नं तुति उलि ख्वाउँइ मखु। थन प्लानिड जूगु फुक्कं साइटिफिक खः। थनया पुखू, थनया देगः, थनया स्तुपा चैत्य फुक्कं टेक्नोलोजी व साइन्सया खँ ल्हाय्गु खःसा थ्व फुक्कं हाइ लेबलया साइन्स खः। थ्व फुक्कं खँ

थुइका सुनां नं इन्जिनियरिड याइसा, आर्टिटेक्चरया ज्या याइसा वा डिजाइन याइ। पर्यटक अप्वय्केत छि न्हू सतकय् वनी अन दय्कातःगु छैय् छु छु तयातःगु दु। अन अप्पा व सिं पिने खनेदइ कथं ख्वपय् थें जूगु खःसा न्हू सतकय् वीपिं लिहां वय् न्ह्याइ मखु। आः ला गबलय् ज्या क्वचाइ, न्हू सतकं लिहां वने धइथें जुइ नि। थुकिं भीगु कल्चर हे प्रिजब मजुल नि। अथे हे लैपुइ ग्रेनाइड तय्गु स्वया अप्पां छीबलय् बांलाः अप्पां छीबलय् अप्पा दथुइ फि तइ गुकिं यानाः लः दुहां वनी। थुकिं जमिन रिचार्ज जुइ।'

प्रलिशा ...

सोसल वेलफेयर चिफया ताज रोनिंसा महर्जनयात लःल्हाःगु खः। सोसल वोलफेयर फष्ट रनरअप दिनिसा डंगोलयात घोषणा याःगु खःसा मिस डिसिप्लिन प्रसिद्धि शाक्य, पपुलर च्वाइस अल्पा महर्जन, बेस्ट ड्रेस प्राश्ना श्रेष्ठ, मिस कल्चर रितिशा वज्राचार्य, कन्फिडेंट कल्चर श्रेष्ठ, पर्सनालिटी सुभेक्षा श्रेष्ठ, बेष्ट हेयर रिम्सा श्रेष्ठ, स्माइल अनुसा वज्राचार्य, मिस चार्मिड सुभाषना श्रेष्ठ व फ्रेन्डशिप रिजु शाक्यं त्याकादीगु खः।

फिनलेया मूपाहाँ माननीय पशुपति शमशेर राणां त्वाः देवाय् मत च्याकाः उलेज्या यानादीगु उगु ज्याइवःया विशेष पाहापिं यल महानगरपालिका १६ वडाया वडाध्यक्ष निर्मल रत्न शाक्य, वर्ल्ड नेवाः अर्गनाइजेशन नेपाः च्याप्टर या नायः सुरेन्द्रभक्त श्रेष्ठ, नेपाल टेलिकमया मेनेजर गंगासागर मतान्छे भयादीगु खः।

श्रृजना श्रेष्ठया निपु म्युजिक भिडियो प्रिमियर

लहना वाःपौ/सृजना श्रेष्ठया निपु म्युजिक भिडियो गुलि हिंसि दुम्ह भाजु व पुलुकक खनेवं बोलया निपू म्युजिक भिडियोया प्रिमियर विश्वज्योति सिनेप्लेक्सय् जूगु दु। थुगु निपुं हे म्युजिक भिडियोल् श्रृजना श्रेष्ठं सः बियातःगु खःसा संगीत मनराजा नकःमिं तयातःगु खः।

म्येया निर्देशन सुरज नापितं यानातःगु दु। गुलि हिंसिदुम्ह मय्जु म्येया च्वमि प्रकाशदीप श्रेष्ठ खः। थ्व छपू पारम्परिक नेवाः म्ये कथं नेवाः बाजं संयोजन यानां दयेकातःगु म्ये खः।

म्येया संगीत संयोजन जिवित जल्मिं याःगु खः। थुगु भिडियोसं अनुज शाक्य व श्रीजा अवालेया जोडी दु। पुलुकक खनेवं म्येया च्वमि जनकावि दुर्गालाल श्रेष्ठ खः। थ्व छपु आधुनिक म्ये कथं संगीत संयोजन यानातःगु दु। थुगु म्येया संगीत संयोजन हरिशरण सायूमिं यानातःगु दु।

भिडियोय् रोजिना सुवाल व भिसुमराज शाक्यया जोडी दु। निपुं म्येया छायांकन व सम्पादन सोहन मानन्धरं यानातःगु दु।

ज्याइवल्य् मू पाहां कथं भयादीम्ह वरिष्ठ संगीतकःमि एवं गायक प्रकाश गुरुङ्गं थौकन्हय् सकलें भाइरल म्ये दय्केगु पाखे



ब्वाँय् वनाच्चंगु दु व भीसं अज्याःगु म्ये दय्केगु पाखे ब्वाँय् जुइ मज्यु धकाः थःगु नुगः खँ प्वंकादिल। नेपालभाषाया न्हापाम्ह सिनेपत्रकार बिजय रत्न असंबरे निपुं म्येया समिक्षा यानादिल। वय्कलं नेवाः म्येत नेवाः युट्युब च्यानलय् तय्माःगु सुभांव बियादिल।

संगीतकःमि मनराजा नकःमिं थुपिं म्येय् यक्वसिया हे मंकाः कुतः दयाः बांलाःगु खँ धयादिल। भिडियो दय्केबलय् अडियोया महत्व नं न्ह्यब्वय्फय्माः धकाः बिचाः प्वंकादिल। ज्याइवः वरिष्ठ म्ये हालामि जुजुकाजी रंजितया सभापतित्वय् जूगु खः।

यँ मनपा कार्यसम्पादन मूल्यांकनय् दकलय् कमजोर



लहनावाःपौ/यँमहानगरपालिका कार्यसम्पादन मूल्यांकन जिल्लान्यकंया दकलय् कमजोर खनेदुगु दु। राष्ट्रिय प्राकृतिक स्रोत तथा वित्त आयोगं याःगु कार्यसम्पादन मूल्यांकनय् महानगरपालिकां ५४.३ ल्याः

जक हःगु दु। १७ गु थीथी सूचकय् आयोगं याःगु मूल्यांकनय् १०० ल्याखय् महानगरं मुस्किलं बच्छि जक ल्याः हःगु खः।

अथेहे, यँ जिल्लाया भीगु नगरय् किपू नगरपालिका ६३.४, शंखरापुरं

६८.१, चन्द्रागिरी ६७.१, टोखा ५८.६, तारकेश्वरं ७१.३, नागार्जुनं ७०.६, बूढानीलकण्ठं ६०.८, दक्षिणकालीं ५४.७, कागेश्वरी मनोहरा ६२.८, गोकर्णेश्वर नगरपालिकां ६४.४ ल्याः हःगु दु। आयोगं दैय् दैसं ल्याइगु प्रदेश व स्थानीय सरकारया कार्यसम्पादन मूल्यांकनया लिच्चः सार्वजनिक याःगु खः।

यँ महानगरपालिकां विनियोजन याःगु बजेट खर्च याय् मफुगु थ्व न्हापांखुसी धाःसा मखु। वंगु दैय् नं यँ महानगरपालिकां बजेट खर्च याय्मफुगु खः। यँ महानगरपालिकां आपालं योजना थम्हं हे यानाच्चंगुलिं यानाः बजेट खर्च याय्त समस्या जुयाच्चंगु खँ अनया कर्मचारी धाय्गु यानाच्चंगु दु।

रञ्जना लिपिं
पिहाँ वयाच्चंगु
रञ्जना लय्पौ
ब्बनादिसँ/ब्बंकादिसँ

प्रचलित नेपाललिपिं पिहाँ वयाच्चंगु
म्हसीका लय्पौ ब्बनादिसँ/ब्बंकादिसँ

लुम्बिनी विश्व सम्पदा स्थलया खतराया धलखय्



लहना वा:पौ/लुम्बिनीयात विश्व सम्पदास्थलया खतराया धलखय् मलाकेत सरकारं पुरातत्व विभागं पेरिसय् च्वंगु नेपा:या दूतावास मार्फत लुम्बिनी सुधार या:गु ज्याया फेहरिस्त छव:गु दु। युनेस्को खुला न्हय: भारतया न्हू दिल्लीइ साउन ६ गते निसे १६ गते तक जूगु युनेस्को वर्ल्ड हेरिटेज कमिटीया ४६ क्व:गु सेसनय् बिउगु निर्देशन कथं लुम्बिनीइ जूगु ज्या एसओपी (स्टेट अफ कन्जर्भेसन रिपोर्ट) छव:गु ख:।

न्हू दिल्लीइ जूगु ज्याइवल्य युनेस्को वर्ल्ड हेरिटेज कमिटीया बैठकय् लुम्बिनीयात खतराया धलखय् छाय् मतयेगु ? धइगु विषयसं सहलह

जूगु ख:सा भारतया संशोधन प्रस्तावया कारणं तत्कालया नितिं खतराया धलखय् मला:गु ख:। उगु सहलह लिपा नेपालं त:गु प्रस्ताव जिज्ञासा व सुभावायात क:धाना: युनेस्को वर्ल्ड हेरिटेज कमिटी फ्रान्सस्थित नेपा:या दूतावास मार्फत १२ बुँदे निर्णय व निर्देशन छवयाह:गु ख:। सरकारं उगु बुँदायात नाला: सुधार, संरक्षण, कानुनी स्पष्टता व नीति निर्माण यांना: प्रतिवेदन पेस या:गु ख:।

युनेस्को थीथी इलय् उत्खनन् या:बलय् लूगु पुरातात्विक भग्नावशेषया संरक्षण, पुरातत्वविदं बारम्बार ल्हवनेगु यांनाच्वंगु न्हयस:, अशोक स्तम्भ, मार्कर स्टोन, नेटिभिटी

स्वलप्वर्सया संरक्षण सम्बर्द्धनया विषय ल्हवना: सुधार यायेत नेपा:यात सुभावा बिउगु ख:।

उकथं हे युनेस्को मायादेवी देग: दुनेया पुरातात्विक भग्नावशेष संरक्षण मजुया: ख्वाउँगु अप्व:गु, सिपेज जुया: समस्या जुयाच्वंगु व ल:या लेवल अप्व:या संरक्षण यायेत छु योजना दु धका: नं न्हयस: न्यनात:गु ख:। कोषं थ्व फुक्कं न्हयस:या लिस: बिया: रिपोर्ट छव:गु ख:।

नेपालं छव:गु रिपोर्टयात कया: युनेस्को वर्ल्ड हेरिटेज कमिटीया ४७ क्व:गु सेसनय् सहलह जुइगु खँ धा:गु दु।

कोषं छव:गु रिपोर्टय् राष्ट्रिय, अन्तर्राष्ट्रिय विषेषज्ञ, मन्त्रालय व पुरातन्त्र विभाग लिसे समन्वय यांना: रिपोर्ट तयार या:गुलिं थुकिं बांला:गु प्रभाव लाइगु खँ धा:गु दु।

दिल्लीइ जूगु सहलहया इवल्य लुम्बिनीयात सम्भावित खतराया धलखं चीके सरकारं थीथी प्रतिबद्धता प्वंकुगु ख:। उकिया नितिं कोषं 'डिजिटल फिजिकल कन्सेप्चुवल प्लान अफ सर्केट गार्डेन' दय्कूगु ख:। लुम्बिनीयात सन् १९९७ सं विश्व सम्पदाया धखल्य त:गु ख:।

केशरमान ताम्राकारया 'मतिनाया बाखं' पिदन

लहना वा:पौ/नांजा:म्ह बाखं च्वमि केशरमान ताम्राकारया न्हूगु सफू 'मतिनाया बाखं' वरिष्ठ आख्यानकार मथुरा साय्मिपाखें वंगु शुक्रवा: भ्यालेनटाइन दिं खुन्हु उलेज्या यांनादिल। थुगु सफू उलेज्या जूमपाखें जूगु ख:। भिक्षु हिरा फाउण्डेसनया लुखां पिदंगु थुगु सफूतिइ गुम्ह भाजु-मय्जुपिनिगु मतिनाया बाखं दुथ्या:।

थुकी छसीकथं जनकावि दुर्गालाल श्रेष्ठ व पूनदेवी श्रेष्ठ, भाषाथुवा मथुरा साय्मि व रमादेवी श्रेष्ठ, बाखंच्वमि शुवर्ण केशरी व पुष्प



चित्रकार, डा. बालगोपाल व श्रीलक्ष्मी श्रेष्ठ, बाखंच्वमि सरस्वति तुलाधर व एमके 'कल्पित', वरिष्ठ सिने पत्रकार बिजयरत्न असंबरे व मीना वज्राचार्य, मनदेवी तण्डुकार व लक्ष्मणकृष्ण ताम्राकार, भुवन साय्मि व प्रमिला साय् मि व कलाकार सुरेन्द्र तुलाधर व सुधा शाक्यपिनि धात्थेया मतिनाया बाखं दुथ्यानाच्वंगु दु। गुदै न्हयर्वनिसे छपु छपु यांना: भाजु ताम्राकारं नेपालभाषा टाइम्सय् शुक्रवा:या तँसापौस पिदना च्वंगु मतिनाया बाखं मुना सफू कथं 'मतिनाया बाखं' पिदंगु ख:।



२०८१ फाल्गुन १० गतेदेखि १७ गतेसम्म।

प्रजातन्त्रको सम्मान गरौं

- राज्य शक्तिको स्रोत जनता हुन्,
- निर्वाचित प्रतिनिधिले शासन गर्ने प्रक्रिया प्रजातान्त्रिक पद्धति हो,
- आवधिक निर्वाचन प्रजातन्त्रको आधारस्तम्भ हो,
- नागरिक सर्वोच्चता, स्वतन्त्रता र समानता प्रजातन्त्रका आधारशिला हुन्,
- प्रजातन्त्रमा मौलिक हक र मानवअधिकारको संरक्षण हुन्छ,
- कानूनी शासन प्रजातन्त्रको अनिवार्य शर्त हो,
- शासकीय क्रियाकलापमा नागरिक सहभागिता र प्रतिनिधित्व सुनिश्चित गरौं,
- सामाजिक न्याय र सामाजिक सुरक्षा कायम गरौं,
- सभ्य, सुसंस्कृत र समुन्नत राष्ट्र निर्माणमा सबैले हातेमालो गरौं,
- प्रजातन्त्रको सम्मान गरौं, प्रजातान्त्रिक संस्कृतिको सम्बर्द्धन गरौं।



नेपाल सरकार

विज्ञापन बोर्ड

छत्रपाटी निःशुल्क चिकित्सालय (अस्पताल)

"स्त्रीय शलभ स्वास्थ्य सेवा सकसिया निति, असहायता निति जक निःशुल्क"

उपलब्ध सेवा

२४सै घण्टा सेवा

- इमरजेन्सी
- प्याथोलोजी
- एक्स रे
- इ.सी.जी
- औषधि पसल
- अन्तरंग सेवा

शल्यक्रिया

- मोनिटिङ्ग
- ज्वरत हतरी
- नाक बान घाँटी सम्बन्धि
- हाडजोर्नी तथा नसा सम्बन्धि
- श्वा विरकार पिप्पाह मसीको पत्तर सम्बन्धि

बहिरङ्ग सेवा

- मुटु रोग
- पेट रोग
- यूरोलोजी
- स्त्री रोग
- बाल रोग
- क्वान्जर रोग
- दन्त रोग
- आँखा रोग
- जलरोग मेडिसिन
- धनं तथा यौन रोग
- नाक बान घाँटी रोग
- जलरोग हेल्थ चेक अप
- बाइरोइड
- मधुमेह

मेमेमू सेवा

- ड्रेसिङ्ग
- इण्डोस्कोपी
- कोलोनोस्कोपी
- फिजियोथेरापी
- अल्ट्रासाउण्ड, क्लर इन्फर र इको
- यूरोलोजी लरको दन्त प्रयोगशाला
- टिएम.टि. हल्टर

२४ घण्टा

ईमरजेन्सी सेवा

७०८ गंगालाल मार्ग, छत्रपाटी, काठमाडौं, फोन: ५३९६९३८, ५३५७९९९, ५३६६२२९